

Na osnovu člana 9. Zakona o Agenciji za bankarstvo Federacije Bosne i Hercegovine ("Službene novine Federacije BiH", br. 9/96, 27/98, 20/00, 45/00, 58/02, 13/03 i 19/03) Upravni odbor Agencije za bankarstvo Federacije BiH, donosi

STATUT

AGENCIJE ZA BANKARSTVO FEDERACIJE BOSNE I HERCEGOVINE

I OPĆE ODREDBE

Član 1.

Agencija za bankarstvo Federacije Bosne i Hercegovine (u daljem tekstu: Agencija) utemeljena je Zakonom o Agenciji za bankarstvo Federacije Bosne i Hercegovine ("Službene novine Federacije BiH", br. 9/96, 27/98, 20/00, 45/00, 58/02, 13/03 i 19/03 u daljem tekstu: Zakon).

Član 2.

Naziv Agencije je:

– Agencija za bankarstvo Federacije Bosne i Hercegovine.

Sjedište Agencije je u Sarajevu.

Skraćeni naziv Agencije je:

– FBA Sarajevo.

Član 3.

Agencija ima svojstvo pravne osobe, sa pravima, obavezama i odgovornostima utvrđenim Zakonom i ovim statutom.

U obavljanju poslova u svezi sa svojom djelatnošću Agencija je potpuno samostalna i neovisna, a za svoj rad je odgovorna Parlamentu Federacije Bosne i Hercegovine (u daljem tekstu: Parlament). Agencija je odgovorna za obveze koje proizilaze iz njezinog poslovanja.

Od formiranja Agencije, Agencija, Upravni odbor Agencije, direktor Agencije, zamjenik direktora Agencije, zaposlenici Agencije, kao i osobe koje je Agencija preporučila ili imenovala za obnašanja određenih radnji u okviru misije Agencije, ne mogu biti gonjeni za krivična djela, niti se smatrati odgovornim u građansko pravnom postupku za bilo koje radnje koje su izvršili u dobroj vjeri u tijeku izvršenja zadaća iz okvira svojih ovlasti. Agencija će obešteti svoje zaposlenike u pravnim postupcima pokrenutim protiv zaposlenika za radnje koje je obavio u dobroj vjeri u tijeku izvršenja svojih dužnosti u okviru svojih ovlasti.

Član 4.

Odredbama ovog statuta uređuje se:

- organizacija i način poslovanja Agencije,
- nadležnost i način rada Upravnog odbora i drugih tijela Agencije,
- prava, obveze i odgovornosti osoba koje obavljaju poslove i zadatke s posebnim ovlaštenjima i odgovornostima, i
- druga organizacijska pitanja u svezi s poslovanjem Agencije.

Član 5.

Agencija posluje preko bankovnog računa u skladu s zakonom koji regulira unutarnji platni promet.

Član 6.

Agencija ima pečat okruglog oblika promjera 50 i 25 mm.

Pečat u koncentričnim krugovima sadrži ispisan tekst: Bosna i Hercegovina, Federacija Bosne i Hercegovine, Agencija za bankarstvo Bosne i Hercegovine, Sarajevo, a u sredini pečata (kruga) se nalazi grb Federacije Bosne i Hercegovine i oznake rednog broja pečata ispod grba.

Pečat podružnice sadrži isti tekst kao i pečat Agencije uz dodatak riječi "Podružnica" sa imenom mjesta sjedišta podružnice.

Agencija ima štambilj koji služi u unutarnjem uredskom poslovanju Agencije.

Agencija može imati i žig za plombiranje promjera 15 mm koji sadrži sve podatke kao i pečat.

Način upotrebe, čuvanje i zaštita pečata, štambilja i žiga određuje direktor Agencije.

Član 7.

U obavljanju svoje djelatnosti Agencija je nositelj javnih ovlasti koje ostvaruje pod uvjetima i na način propisan Zakonom i drugim propisima Federacije Bosne i Hercegovine, a čine ih:

- zaštita depozita,
- monetarna stabilnost i efikasnost,
- konkurentnost bankarskog sustava,
- zaštita klijenata banaka.

II ZADACI I POSLOVI AGENCIJE

Član 8.

Radi ostvarivanja zadataka utvrđenih Zakonom Agencija obavlja stručne i druge poslove, i to:

- prikuplja zahtjeve i obrađuje dokumente potrebne za izdavanje dozvola za osnivanje banka i promjenu organizacijskog ustroja banaka, te vrste poslova koje banke obavljaju,
- izdaje dozvole za osnivanje banaka,
- izdaje dozvole za promjenu organizacijskog ustroja banaka,
- izdaje (dozvole za promjenu poslova koje banka obavlja) ostale dozvole i saglasnosti koje se odnose na poslovanje banke,
- prikuplja zahtjeve i obavlja razgovore (intervjue) sa kandidatom za direktora banke,
- izdaje saglasnost za imenovanje članova organa upravljanja i rukovođenja banke,
- donosi provedbene propise i akte koji reguliraju rad banaka,
- prikuplja, obrađuje i evidentira podatke koje banke dostavljaju Agenciji sukladno propisima, vrši kontrolu rada banaka pregledom računa i druge dokumentacije u banci,
- utvrđuje metodologiju za kontrolu rada banaka,
- utvrđuje redoslijed (ranking) banaka po datoj metodologiji,
- sastavlja zapisnike i donosi rješenja i poduzima mjere za reguliranje rada banka sukladno Zakonu,
- ukida dozvole za rad bankama,
- vrši nadzor nad obaveznom rezervom banaka,
- vodi postupak privremene uprave u banci,
- upravlja ili vrši nadzor nad postupkom sanacije i likvidacije banaka, te pokreće stečajni postupak nad bankom,
- vrši radnje u pomaganju antiterorističkih mjera koje se odnose na banke u skladu sa zakonom,
- u skladu sa zakonom poduzima sve radnje koje mogu biti potrebne u cilju sprječavanja finansiranja aktivnosti kojima se opstruira ili prijeti da se opstruira proces provedbe mira koji se odvija pod pokroviteljstvom Općeg okvirnog sporazuma za mir u Bosni i Hercegovini,

- surađuje sa Centralnom bankom Bosne i Hercegovine sukladno Zakonu,
- u suradnji sa Centralnom bankom Bosne i Hercegovine surađuje s međunarodnim organizacijama, te predstavlja Federaciju Bosne i Hercegovine i učestvuje u radu međunarodnih organizacija u svezi s izdavanjem dozvola i nadzorom rada banaka,
- obavlja i druge poslove određene Zakonom i drugim propisima.

Član 9.

Javna ovlaštenja čiji je nositelj, Agencija ne može prenositi na treće osobe.

III SREDSTVA I PRIHODI AGENCIJE

Član 10.

Sredstva za osnivanje i poslovanje Agencije formiraju se iz:

- naknada za izdavanje dozvola za osnivanje i rad banaka,
- naknada za izdavanje odobrenja za obavljanje bankarskih poslova,
- provizija i naknada za vršenje nadzora banaka,
- sredstava iz propračuna Federacije Bosne i Hercegovine,
- naknada za izvršavanje ostalih usluga,
- donacija,
- prihoda iz drugih izvora.

Član 11.

Iz sredstava Agencije pokrivaju se obveze Agencije, te sredstva za nabavu sredstava rada i poslovanja, plaće djelatnika Agencije i druge troškove u skladu sa Zakonom i ostalim propisima Federacije Bosne i Hercegovine.

Član 12.

Prijedlog programa rada i finansijski plan Agencije donosi Upravni odbor i to do kraja tekuće godine za narednu godinu.

Agencija dostavlja izvješće o poslovanju Parlamentu putem Vlade Federacije Bosne i Hercegovine (u daljem tekstu: Vlada) u roku od 3 (tri) mjeseca od kraja izvještajne godine.

Član 13.

Za pokriće rizika nastalih poslovanjem u obavljanju djelatnosti Agencije kao i za pokriće nedostataka prihoda u odnosu na ostvarene rashode, Agencija ima sredstva posebne rezerve.

Sredstva posebne rezerve Agencija izdvaja iz sredstava prihoda Agencije u visini koju na prijedlog direktora Agencije odredi Upravni odbor.

Odluku o upotrebi sredstava posebnih rezervi donosi Upravni odbor na prijedlog direktora Agencije.

IV UPRAVLJANJE I RUKOVOĐENJE AGENCIJOM

Član 14.

Upravljanje i rukovođenje Agencijom uređuje se Zakonom, Statutom i drugim općim aktima, u skladu sa Zakonom.

1. Upravni odbor

Član 15.

Organ upravljanja Agencijom je Upravni odbor.

Član 16.

Upravni odbor ima 5 članova.

Članove Upravnog odbora imenuje Parlament na prijedlog Vlade.

Upravni odbor se imenuje na period od 5 godina.

Predsjednika, kao i zamjenika predsjednika bira Upravni odbor iz reda svojih članova.

Član 17.

Upravni odbor donosi odluke većinom glasova od ukupnog broja članova Upravnog odbora, s tim da se odluka iz članka 8. alineja 7. donose izjašnjavanjem "za" četiri člana Upravnog odbora.

Upravni odbor svojim poslovnikom može propisati tajno izjašnjavanje članova Upravnog odbora.

Član Upravnog odbora koji se ne slaže s odlukom Upravnog odbora može izdvojiti mišljenje koje mora biti obrazloženo.

Član 18.

Upravni odbor ima slijedeće nadležnosti:

- donosi Statut Agencije,
- donosi Pravilnik o unutarnjem ustroju Agencije,
- donosi Pravilnik o plaćama i drugim primanjima djelatnika Agencije,
- donosi Pravilnik o poslovnoj tajni,
- donosi Odluku o tarifi-naknadi za obavljanje poslova,
- donosi Poslovnik o radu Upravnog odbora,
- donosi akte koji reguliraju rad banaka,
- donosi godišnji program rada Agencije,
- usvaja financijski plan i financijska izvješća Agencije,
- donosi odluke o investicijskim ulaganjima iznad 50.000,00 KM,
- pokreće inicijativu za smjenu direktora i zamjenika direktora ukoliko ne prihvate izvješća ili na drugi način negativno ocijene rad direktora i zamjenika direktora,
- usvaja izvješća koje Agencija pravi prema prema članku 27. Zakona,
- donosi odluku o visini posebnih rezervi Agencije,
- donosi i druge akte u skladu sa Zakonom.

Član 19.

Predsjednik Upravnog odbora saziva sjednice, predlaže dnevni red sjednica, predsjedava sjednicama i potpisuje odluke i druge akte Upravnog odbora.

Predsjednika, u slučaju njegove spriječenosti i nenazočnosti zamjenjuje zamjenik predsjednika Upravnog odbora.

Član 20.

Član Upravnog odbora ima pravo na naknadu za svoj rad u Upravnom odboru kao i naknadu ostalih troškova u svezi nazočnosti na sjednici.

Visinu naknade utvrđuje Upravni odbor.

Član 21.

Upravni odbor je za svoj rad odgovoran Parlamentu.

2. Direktor

Član 22.

Direktor Agencije vrši slijedeće poslove:

- izdaje i ukida dozvole za obavljanje bankarskih poslova, poduzima propisane mjere prema bankama,
- daje suglasnost za imenovanje rukovodnog osoblja članova organa uprave i rukovođenja banke,
- sklapa obveze i ugovore u interesu Agencije,
- imenuje osoblje i zastupnike Agencije,
- predlaže Upravnom odboru provedbene propise i akte iz članka 18. Statuta koje su u nadležnosti Upravnog odbora,
- osigurava pripremanje materijala, potrebnih stručnih i drugih informacija za raspravljanje i odlučivanje, priprema prijedloge odluka, zaključaka i drugih akata za sjednice Upravnog odbora,
- provodi odluke, zaključke, upute i druge akte Upravnog odbora u svezi s djelatnošću Agencije,
- priprema i predlaže Upravnom odboru program rada i financijski plan Agencije, te opće akte Agencije,
- donosi Pravilnik o sistematizaciji radnih mjesta Agencije,
- donosi odluku o početku rada organizacijskih jedinica (podružnica) Agencije,
- donosi Pravilnik o radnim odnosima djelatnika Agencije,
- donosi akte koji reguliraju poslovanje banaka,
- donosi odluku o investicijskim ulaganjima do 50.000,00 KM,
- po potrebi donosi odluke o osnivanju stručnih savjeta, odbora, komisija ili drugih radnih tijela za stručnu obradu pojedinih pitanja iz djelokruga Agencije i određuje njihov sastav,

- donosi pojedine odluke i druge pravne akte o poslovanju Agencije u skladu sa Zakonom i Statutom,
- odgovora za zakonitost rada, pravilno i zakonito vođenje materijalnog i financijskog poslovanja Agencije,
- obavlja i druge poslove propisane Zakonom i Statutom.

Član 23.

Na prijedlog Vlade Parlament imenuje direktora Agencije na period od pet godina.

Član 24.

Direktor ima zamjenika direktora kojeg na prijedlog Vlade imenuje Parlament na period od pet godina.

U slučaju odsutnosti direktora zamjenjuje zamjenik direktora sa svim pravima i obvezama.

Član 25.

Za svoj rad direktor i zamjenik direktora odgovaraju Upravnom odboru i Parlamentu.

Član 26.

Upravni odbor, direktor ili zamjenik direktora će se razrješiti dužnosti prije isteka mandata ukoliko je osuđen za krivično djelo koje ga čini nedostojnim službe.

Član 27.

Parlament može razrješiti dužnosti člana Upravnog odbora, direktora ili zamjenika direktora Agencije ukoliko:

- nije sposoban da vrši djelatnost te službe zbog zdravstvene nesposobnosti,
- je bio upleten u prekršaj koji znatno oštećuju interese ili autoritet Agencije, po nalazu nadležnog tijela.

Član 28.

Član Upravnog odbora, direktor ili zamjenik direktora Agencije mogu podnijeti ostavku.

Ostavka mora biti pismeno obrazložena.

U slučaju podnošenja ostavke funkcioneri iz stavka 1. ovog članka ostaju na dužnosti do razrješenja, a najdulje tri mjeseca od dana podnošenja ostavke.

Član 29.

Članovi Upravnog odbora, direktor i zamjenik direktora Agencije mogu biti ponovo imenovani, ukoliko ne postoje smetnje iz čl. 26. i 27. ovog statuta.

Član 30.

Direktor i zamjenik direktora ne mogu bez prethodne saglasnosti Upravnog odbora biti imenovani u upravni odbor banke ili na poslove direktora banke u periodu od dvije godine nakon prestanka rada u Agenciji.

Član 31.

Članovi Upravnog odbora, direktor, zamjenik direktora, zastupnici, službenici i namještenici, ne smiju primati nikakve novčane ili druge darove, ako bi to moglo utjecati na njihovu objektivnost u obavljanju poslova Agencije.

V ORGANIZIRANJE RADA AGENCIJE

Član 32.

Organiziranje rada Agencije, njeno unutarnje ustrojstvo, način rada, broj izvršitelja uređuje se Pravilnikom o unutarnjem ustroju Agencije i Pravilnikom o sistematizaciji radnih mjesta.

VI JAVNOST RADA AGENCIJE

Član 33.

Agencija osigurava javnost rada suradnjom sa sredstvima javnog informiranja, te izvješćivanjem javnosti o radu i poslovanju Agencije.

Član 34.

Radi potpunijeg informiranja javnosti o svom radu i poslovanju Agencija može donijeti odluku o izdavanju posebnih publikacija, biltena i glasila.

Njihovu programsku koncepciju kao i bliže uvjete izdavanja svojom odlukom utvrđuje Upravni odbor.

VII POSLOVNA TAJNA

Član 35.

Poslovnu tajnu čine dokumenti i podaci čije bi priopćenje neovlaštenoj osobi štetilo interesima i ugledu Agencije.

Upravni odbor općim aktom određuje koji se podaci i dokumenti smatraju poslovnom tajnom, način postupanja s tim dokumentima i podacima, kao i mjere njihove zaštite.

Član 36.

Članovi Upravnog odbora, direktor, zamjenik direktora, djelatnici i zastupnici Agencije dužni su čuvati poslovne tajne Agencije u skladu s općim aktom iz članka 35. ovog statuta.

Obveza čuvanja poslovne tajne ostaje i poslije prestanka radnog odnosa u Agenciji, odnosno članstva u Upravnom odboru.

Član 37.

Ne smatra se odavanjem poslovne tajne, priopćenje dokumenata i podataka putem izvješća koje Agencija dostavlja Vladi, Parlamentu i Centralnoj banci Bosne i Hercegovine i drugim ovlaštenim institucijama.

VIII AKTI AGENCIJE

Član 38.

Opći akti se oglašavaju na oglasnoj ploči Agencije, a akti iz članka 18. alineja 1., 2., 5. i 7. se objavljuju u "Službenim novinama Federacije BiH".

Član 39.

Izmjena i dopuna općih akata vrši se na način i po postupku njihovog donošenja.

IX IZMJENE I DOPUNE STATUTA

Član 40.

Inicijativu, odnosno prijedlog za izmjene i dopune Statuta Agencije, mogu dati Vlada, Upravni odbor, direktor i zamjenik direktora Agencije.

Član 41.

O izmjenama i dopunama Statuta raspravlja i odlučuje Upravni odbor na način i po postupku propisanom za donošenje Statuta.

X PRIJELAZNE I ZAVRŠNE ODREDBE

Član 42.

Tumačenje pojedinih odredbi ovog statuta daje Upravni odbor Agencije.

Član 43.

Statut stupa na snagu danom dobijanja saglasnosti Parlamenta, a objaviće se u "Službenim novinama Federacije BiH".

Član 44.

Danom stupanja na snagu ovog statuta prestaje da važi Statut Agencije za bankarstvo Federacije Bosne i Hercegovine ("Službene novine Federacije BiH", broj 21/96).

Broj 01-1-2159-2/03
9. decembra 2003. godine
Sarajevo

Predsjednik
Upravnog odbora
mr. **Eldar Arnautović**, s.r .